


# Premiera per 49 novizs

Avertura da la nova perioda da legislatura 2010–2014 dal cussegl grond

DA MARTIN CABALZAR

■ Oz sa raduna il cussegl grond per l'emprima sessiun da la nova perioda da legislatura 2010–2014. Per 49 deputadas e deputads munta quai la premiera en il parlament grischun. Tranter ils 120 deputads sa chattan 26 dunnas. En la perioda da legislatura 2010–2014 sa cumpona il cussegl grond da las tschintg suandantas fracziuns: liberaldemocrats cun 40 mandats, cristiandemocrats cun 32 mandats, burgais-democrats cun 27 mandats, socialdemocrats cun 14 mandats (incl. il suppleant da Brusio che remplaza Rodolfo Plozza permiert e *Nicoletta Noi* senza partida) e pps/libers cun 5 mandats. Senza fracziun èn ils dus deputads verd-liberals. La fracziun da la pcd vegn manada da nov da *Marcus Caduff*, la pbd da nov dad *Andreas Felix*, la pld vinavant da *Reto Nick*, la ps vinavant dad *Andreas Thöny* ed ils libers/pps da nov da *Renatus Casutt*. Da las cumissiuns permanentas occupescha la pld 28 sezs, la pcd 24, la pbd 19, la pld 9 ed ils libers/pps 3. Senza represchentananza en las cumissiuns èn ils verd-liberals.

La nova perioda da legislatura vegn averta oz a las 14.00 cun in pled d'avertura dal president senior. Questa onur ha *Vincent Au-*



Oz sa raduna il cussegl grond en sia cumposiziun nova per l'avertura da la perioda da legislatura. FOTO N. SIMMEN

*gustin* (pcd Cuir) che appartegn già 23 onns al cussegl grond. Alura passa il cussegl grond a l'elecziun dal presidi e vicepresidi dal cussegl grond. Sco nova presidenta propona la fracziun socialdemocratica *Christina Bucher-Brini*

(Cuir) e sco vicepresidente ha la fracziun burgais-democratica nominà *Ueli Bleiker* (Giuvaulta). Suent l'ovaziun a la nova presidenta vegnan deputadas e deputads seramentads. Fatschentas dispaivlas en questa sessiun èn

cunzunt la revisiun da la lescha per promover la tgira da malsaus che vul engreviar dapli las vischnancas e la lescha davart la surdada da medicaments.